



Til

Meland Kommune
Postboks 79
N-5906 FREKHAUG

Att.: Laila Bjørge

Dykkar ref.:

Vår ref.: 8108/LLY/2015-2

10. desember 2015

Søknad om kommunalt tilskot til Norsk Landbruksrådgiving (NLR) Hordaland i 2016

Norsk landbruksrådgiving Hordaland vil takke for tilskot **Meland Kommune** tidlegare har gjeve til arbeidet vårt, og vi søker no om tilskot for 2016. Vi vonar kommunen har nytte av samarbeidet med landbruksrådgivinga og arbeidet vi utfører.

Tilskota frå kommunane er viktig og gjev oss moglegheit til informasjons- og utviklingsarbeid, som er vanskeleg å finansiere fullt ut med andre midlar. NLR Hordaland er ein medlemsorganisasjon, og i alt er omlag 1540 bønder i Hordaland medlem hjå oss.

Vi er ei uavhengig, landbruksfagleg rådgivingsteneste. Rådgjevarane våre, som har kontor fleire plassar i fylket, ynskjer å vere gode støttespelarar for kommunane og bøndene, både når det gjeld utvikling av landbruket og informasjon om tilskotsordningar, reglar, forskrifter og andre nyhende som gjeld landbruket.

Fagleg verksemd – utvikling av landbruksnæringa

Dei kommunale tilskota medverkar til at vi kan skaffe ny landbruksfagleg kunnskap lokalt i Hordaland. Vi har dei siste åra hatt fokus på optimal produksjon av gras og grovfôr, både på fagmøter og ved individuell rådgiving. Framover vil vi arbeide meir med klimasmart landbruk og gje bonden råd om meir klima- og miljøvenleg drift.

I fleire år har vi på fagmøte og kurs, motivert til meir bærproduksjon. Det er aukande interesse for bær dyrking i heile fylket og vi tilbyr alle nye bærprodusentar tett oppfølging gjennom heile vekstsesongen, ved gardsbesøk, telefonrådgiving og fagmøte. Vi sendar ut eigne e-post meldingar for bær dyrkarane.

I 2016 vil vi arbeide for å auke grønsak- og potetproduksjonen i Hordaland. Vi vil tilby kurs, markdagar og individuell rådgjeving i grønsak- og potet dyrking. På mange mindre bruk kan dette gje betre inntekt og lønsemd enn husdyrhald. Arbeidet er støtta av Hordland Fylkeskommune og Fylkesmannen i Hordaland.

NLR Hordaland har kvart år kurs i bedriftsutvikling og etablering i landbruket. Økonomirådgivarane våre hjelper også til med driftsplanar og søknader om tilskot til Innovasjon Norge. Nytt i 2015 er introduksjonskurs for nye bønder som går over tre kveldar med tema bedriftsleiing, produksjon og økonomi. Vi vil også ha to slike kurs i 2016.

Bonden kan også få tilbod om rådgjeving i «Dynamisk strategi». Gjennom ei grundig vurdering av drifta på garden, gjev vi råd om korleis økonomien kan verte betre, enten ved å redusere kostnadene eller å auke inntektene.

Betre økonomisk resultat i landbruket og utvikling av næringa, gjev auka verdiskaping og sikrar arbeidsplassar på gardane, som igjen medverkar til inntekt i kommunen. NLR Hordaland ynskjer å vere ein viktig støttespelar for bonden der nyskaping og utvikling skjer. Våre rådgivarar har brei erfaring og godt nettverk, og vi kan foreslå løysingar eller peike på utfordringar som bonden sjølv ikkje har tenkt på.

Den offentlege miljøforvaltninga har i det siste lagt vekt på landbruket si rolle for det biologisk mangfaldet og for å ta vare på kulturminne knytt til landbruksareal. Vi har spisskompetanse på

Kompetanse for framtida!



kulturminne og biologisk mangfold og kan lage skjøtselplanar for utvalde kulturlandskapsområde i samarbeid med grunneigar. Det gjeld både slåttemarkar, kystlynghei og kulturminne.

Hjelp til å imøtekomme offentlige krav

Det er mange som spør oss om regelverk, forskrifter og tilskotsordningar for landbruket. Vi legg vekt på at rådgjevarane skal vere oppdatert på endringar som skjer, slik at vi kan gje gode råd og svar. NLR Hordaland ser det som ei viktig oppgåve å hjelpe bøndene å imøtekomme offentlege krav. Vi tek jordprøver og utarbeidar gjødselplanar, gjev svar som gjeld KSL og arrangerer autorisasjonskurs for kjøp og bruk av plantevernmidlar.

Informasjon frå oss.

Informasjon ut til bonden og landbruksnæringa er viktig. Gjennom heile året arrangerer vi informasjonsmøte, markdagar og kurs om nyhende og nye utfordringar for landbruket, ofte i samarbeid med kommunane eller fylkesmannen. Vi sender ut e-postmeldingar til medlemmer og samarbeidspartnarar, og vil i tillegg sende ut medlemsskriv i posten til dei som ikkje har e-post. Om de ikkje får rådgivingsmeldinga vår på e-post, send ei melding til hordaland@lnr.no.

På nettsida vår <http://hordaland.lnr.no/> legg vi ut informasjon om verksemda og nyhende i landbruket. Vi har også eigen Facebook-side.

Anna

Vi yter tenester til alle, også til dei som ikkje er medlemmer. Våre kurs, fagmøte og markdagar er opne for alle, og vår kompetanse kan kome alle bønder til gode.

Vi får også tilskot gjennom jordbruksavtalen. Dette tilskotet er reelt sett meir enn halvert dei siste åra, og dei kommunale bidraga har stått fast på same kronebeløp. Reduksjon i tilskotskroner har vi klart å erstatte i hovudsak ved auka eigenbetaling, men også gjennom prosjektinntekter, oppdragsverksemd og meir effektiv drift.

Vi ynskjer eit godt samarbeid med kommunane i Hordaland og set pris på innspel frå kommunane når det gjeld aktivitetar vi kan samarbeide om. Vi kan også ta oppdrag for kommunane blant anna når de gjeld arbeid med kommuneplan, vassdirektiv, verdsetting av landbruksareal, vurdering av areal for landbruksproduksjon mm.

Vi takkar for tilskot som **Meland Kommune** tidlegare har gjeve til Landbruksrådgivinga. Vi håpar kommunen framleis vil yte stønad og vil med dette søke om tilsvarande tilskot som tidlegare år.

Med venleg helsing for
Norsk Landbruksrådgiving Hordaland

Liv Lyngstad, dagleg leiar